


滿洲名臣傳

廿五上



庫文閣內		漢書
三八函架	二二〇五册號	

庫文閣內		
五	二	

內閣文庫		
番號	漢	2300
冊數	160	(49)
函號	290	43




A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak





滿洲名臣傳卷二十五

喀齊蘭

朋春

于成龍

郭世隆

貝和諾

錫

達哈塔

沙納哈

滿丕 王 臣

喀齊蘭別傳

喀齊蘭滿洲正黃旗人姓伊爾根覺羅氏先

世居瓦爾喀地祖赫臣當

太祖高皇帝創業時率族屬來歸即俾轄之

為佐領從征烏拉有功奉使葉赫拉

滿洲名臣傳

葉赫貝勒錦台什使人害之

太祖旋滅葉赫令其子克宜福及讐人以祭
又襲管佐領事天聰四年

太宗文皇帝征明克永平以克宜福為捉生
將擒敵兵生擒二人獲馬十七匹又為前
哨斬明兵二人獲馬一匹望見敵踞山結營
馳還以告

太宗遣大臣率兵破之八年集錄
開創以來諸臣功次予騎都尉職世襲

崇德二年授吏部副理事官六年隨鄭親王
濟爾哈朗圍明錦州其城東關廂之蒙古諾
木齊等謀內應為明將所覺圍困之克宜福
衝入破敵陣援以出並獲其家口來歸得
優賚

世祖章皇帝順治二年授

福陵總管兩遇

恩詔晉世職三等輕車都尉尋卒喀齊蘭其
次子也初由前鋒校襲管佐領授吏部理事

官十三年署叅領隨寧海大將軍伊爾德勦
明魯王朱以海遺党于舟山屢戰皆捷凱旋
紀功授護軍叅領

聖祖仁皇帝康熙十三年任前鋒叅領隨順
承郡王勒爾錦討逆藩吳三桂十八年大軍
自荊州渡江克復松滋縣都統根特副都統
瑪爾齊哈令喀齊蘭率前鋒兵征澧州將薄
城賊衆迎拒喀齊蘭擊潰之轉戰追逐至江
岸生擒三人獲纛幟軍械無算城中僞文武

官以城降凱旋紀功擢正黃旗蒙古副都統
二十一年六月調本旗滿洲副都統二十四
年二月以疾乞罷

命原品致仕三十八年十月卒

賜祭葬如例子凱音布初襲克宜福三等輕
車都尉世職仕至禮部尙書別有傳

朋春列傳子增壽附

朋春滿洲正紅旗人姓棟鄂氏何和哩之四
世孫也順治九年六月襲其父哲爾本一等

公簡

聖祖仁皇帝康熙十五年

恩加太子太保授正紅旗蒙古副都統二十一年二月調本旗滿洲副都統八月

命同副都統郎坦率兵赴黑龍江時俄羅斯人來邊境者咸稱爲羅利朋春奉

諭曰羅利犯我黑龍江邊境昔曾發兵進討未獲翦除近又侵入精奇哩江諸處恃難克薩城爲巢穴蔓延益甚爾等至達呼爾察倫

遣人赴尼布楚諭以捕鹿之故因詳視陸路近遠沿黑龍江行圍徑薄雅克薩城下勘其居址形勢度羅利斷不敢出戰如出戰姑勿交鋒但率衆引還朕別有區畫

賜御用裘服及弓矢以行十二月還奏羅利久踞雅克薩恃有木城若發兵三千携紅衣砲二十具即可攻取陸行自興安嶺以往雖無險山而林木叢雜途徑窄隘冬雪之時沙結堅冰夏日遇雨泥深淤阻惟輕裝可行水

程自雅克薩還至愛濤城于黑龍江順流行
船僅須半月觀兩岸悉可牽挽若逆流行船
約須三月較從陸路倍期運糧餉砲具爲便
現有大船四十小船二十六宜增造小船五
十餘

詔寧古塔將軍巴海副都統薩布素建木城
于黑龍江呼瑪爾二處調所部兵一千五百
往駐造船運砲二十二年正月擢正紅旗蒙
古都統三月調本旗滿洲都統二十四年正

月

詔選福建投誠善用藤牌兵在八旗及安插
山東山西河南者四百人付鑾儀使林興珠
臺灣投誠左都督何祐轄領赴

盛京朋春統之進勦以副都統班達爾沙瑪
拉護軍統領佟寶等及林興珠叅贊軍務師
旣行

上遣侍衛關保往黑龍江傳

諭曰兵凶器戰危事古人不得已而用之朕

以仁治天下素不嗜殺爾其嚴諭將士毋違
朕旨以我兵馬精強器械堅利羅刹勢不能
敵必獻地歸誠爾時勿殺一人俾還故土宣
朕柔遠至意五月師薄雅薩克城遣人以書
諭降不從軍其城南集衆船于城東南進紅
衣砲于城北將夾攻之城下三面積柴爲焚
城狀城中大驚其頭目額里克舍窮蹙乞降
乃宣

恩諭宥其罪額里克舍垂涕稽顙謝引六百

餘人徙去毀其城以願來歸附之巴什里等
四十五戶及前此掠往之索倫達呼爾百餘
戶移內地安輯師旋紀功二十九年七月
上命裕親王福全爲撫遠大將軍勦噶爾丹
以朋春與都統蘓努等叅贊軍務蘓努率左
翼朋春率右翼八月朔至烏蘭布通噶爾丹
依山列陣右翼兵爲河岸泥淖所阻左翼兵
由山腰衝入大破之日暮收兵次日噶爾丹
遣使矢誓請和以緩我師乘夜由大磧山遁

去十一月師旋部議王大臣調度乖方不追
勦敗寇罪革職任

上以此舉旣擊走噶爾丹概從寬處分朋春
降四級留任三十一年三月解都統任赴西
路軍前管營隊三十五年正月仍復正紅旂
蒙古都統

命爲撫遠大將軍費揚古叅贊由西路勦噶
爾丹五月破賊于昭莫多凱旋因本隊陣亡
護軍驍騎十八人未收遺骸議罪以應敘昭

莫多軍功抵免三十六年七月彙敘西路出
師奮勇勞績增注所襲一等公

勅書三十八年六月以疾辭都統任四十年
四月疾卒子增壽循例銷去

恩詔所加之爵改襲三等公四十一年九月
授正黃旂漢軍副都統四十三年三月調雁
藍旂滿洲副都統五十一年罷任六十年卒
子恒泰襲爵授散秩大臣

世宗憲皇帝雍正九年追封何和哩爲勇勤

公其世襲之三等公亦加號勇勤

于成龍列傳

于成龍漢軍廂黃旗人

聖祖仁皇帝康熙七年由廕生授直隸樂亭知縣八年署灤州知州以罪囚脫逃降調樂亭民列其善政叩

閩額留部議保留疊經飭禁械爲首者繫獄九年二月縣民再叩

聞下巡撫金世德察奏所列善政皆寔復縣

任十三年六月以緝盜逾限未全獲應降調金世德奏言樂亭舊號疲邑成龍撫綏調劑與民相宜可否留任部議不准得

旨于成龍撫綏疲邑與民相宜其留任十八年擢通州知州二十一年直隸巡撫于成龍遷兩江總督疏薦其可大用尋又請

勅廷臣推清操久著與相類者爲江寧知府上卽擢成龍任之二十三年十月上南巡至江寧傳

兩州名臣傳卷二十一

諭曰朕在京師聞爾居官廉潔今臨幸此地
確加咨訪與所聞無異用錫親書手卷以嘉
爾清操十一月擢安徽按察使
駕還京

賜其父原任叅領于得水貂裘獎其教子有
方又

諭八旗都統侍郎諸臣有子弟官外者各賚
書訓勉效成龍之潔已愛民二十二年三月
擢直隸巡撫瀕行

賜銀千兩表裏二十端

諭詢畿輔重地利弊應興革者宜何先成龍
奏弭盜爲先奸惡之徒倚仗旗下名色窩藏
匪類有司明知而莫敢深究嗣後有如此者
臣當執法治之旣抵任疏言弭盜之方在力
行保甲今民間已申飭遵行惟旗下莊屯向
不屬州縣管轄本旗統領官遠在京城僅有
撥什庫在屯未能約束今應令旗人與民戶
同編保甲以撥什庫與鄉長互相稽察無論

盜所刦之家是旂是民俱協力救護能擒獲者賞給如窩盜縱盜許州縣官詰訊申報又疏言燕山六衛所轄遼瀾與州縣不相統屬遇有賊盜止責汛弁緝拿而衛員漠不關心此賊盜所以充斥也請嗣後以衛地近州者歸州近縣者歸縣則保甲易編匪類易察京東之通州西之盧溝橋南之黃村北之沙河宜設捕盜同知四員分駐其地自守備以下分汛各宜檄巡墩臺諸務及旂下莊屯悉歸

九

稽察則武弁有所顧忌旂人亦受約束矣疏並下部議行先後察究武清易州等處怙惡不悛之旂人請

旨寘諸法又疏言順德廣平大名等府額解狐皮花絨芝蔴運送費多恐借端苛派請改解拆色又言河工歲修派夫應令旂地與民地一体計畝均役下部議格于例並得旨如所請行二十六年四月

上以于成龍廉能稱職誠心愛民

特旨嘉獎加太子少保十月
巡行畿甸

賜鞍馬並銀千兩十二月

詔同山西巡撫馬齊往鞏湖廣巡撫張沂貪
欸得寔論罪如律二十七年三月回任初于
成龍任安徽按察使靳輔爲河道總督大治
淮黃隄垣

上以其未能兼顧下河

勅成龍督理之遇事得自陳奏成龍請濬海

口故道靳輔請于下河築長堤束水注海

上詔詢籍隸淮揚諸臣奏宜從成龍請工部
尙書薩穆哈奉

命往問居民還奏百姓僉謂濬海口無益大
學士九卿議未決成龍遷巡撫以侍郎孫在
豐督理下河靳輔奏開中河以便漕運又請
于高家堰外增築重堤束水北出清口則下
河不濬自治

上以疏示成龍成龍奏下河宜濬重堤不宜

築開中河無益反爲民累

上允靳輔開中河遣尙書佛倫侍郎熊一灋同總督董誥總漕慕天顏會勘增築重堤事佛倫等還奏宜從靳輔請慕天顏孫在豐御史郭琇相繼劾靳輔與屯累民靳輔亦劾慕天顏孫在豐附和成龍朋謀阻撓至是成龍自湖廣還

詔同靳輔入對靳輔言開濬海口有海水倒灌之患成龍奏若築高家堰重堤縱上流之水不來而秋霖暴漲天長六合等處之水洩歸何處故海口仍應開濬

上罷靳輔任以福建總督王新命代之別遣部臣代孫在豐五月學士開音布侍衛馬武閱中河還奏商賈舟行不絕漕運可通又劾慕天顏前此禁止堵塞支河勒令已進中河漕運退回有意阻撓

命逮慕天顏鞠問得成龍寄書令勿順從靳輔狀議削成龍太子少保降二級調用得

旨留巡撫任二十八年正月從

上閱河同侍郎徐廷璽往視下河還奏串場河已興工挑濬自丁谿場至白駒場有通海之處三陷子灶上又有歸入丁谿之馮家垵小河宜加挑濬俾河堦之水由丁谿入苦水洋從之是年畿輔旱

詔發帑金三十萬兩賑濟成龍疏言兵丁仰借月糧今歲米豆騰貴請加給折色之半又言旂下莊屯貧戶及未成災州縣貧民請酌

議賑恤又言長蘆鹽引前以軍興需餉加增有壅積未銷者請豁免征課並得

旨俞允二十九年正月以部推井陘道甘文煥久不赴任奏荐湖廣知府武廷适戴夢熊王輔請

簡補

諭責以收羅別省官員之心破壞定例不准行七月疏請增設通州昌平順義等州縣及榆林土木等駟馬匹大名府通判二員移一

員駐古北口管理駟務移密雲縣丞駐石匣
腰站並下部議從之是年內陞左都御史兼
願紅旂漢軍都統三十一年二月王新命爲
山東巡撫佛倫劾罷靳輔仍復任十二月靳
輔卒成龍任河道總督三十二年五月疏言
靳輔令河員領帑購買柳束工部駁減銀一
萬八千兩今覆覈並無虛冒又言靳輔興築
高家堰重堤豫給夫役銀四萬四千餘兩再
新命一再題銷工部以非例飭追寔因向來

募夫遠方悉給安家路費工完扣抵故無扣
給之名此重堤工作中止未經扣抵今訪察
豫給是真無從追繳

詔並與豁免三十三年正月奉

詔至京疏言運河自通州天津至山東嶧縣
卑薄各堤宜加築高厚武清八百戶等處宜
增建月堤黃河自榮澤縣至江南楊山縣卑
薄各堤均宜加築高堰六埧周橋大埧永安
西堤均宜改建石工其毛城舖等處舊有引

河宜疏濬深通檀度寺東堤及茆家園等處
挑挖引河卽以所挖之土增築兩岸束水子
堤徐州城石岸急應大修清江浦迤下至黃
浦東西兩堤揚州屬江都東隄高郵西隄俱
需加築並修葺閘壩涵洞又疏言河防各設
專員並無顧此失彼之虞天津道有地方職
掌應增設兩道一駐河西務一駐倉州分管
北自通州南至德州河務江南河工錢糧向
分廳庫收支不屬淮徐淮揚兩道職掌應增

設河庫道桃源同知現駐南岸應增北岸同
知一邳睢同知宿虹同知現皆駐北岸應增
南岸通判各一山陽清河舊設同知一應增
一員分管兩縣毛城鋪閘壩緊要徐屬同知
難以兼顧應增通判一駐碭山縣又疏言河
工所費繁多非開捐例不可但銀數太多則
無力者裹足不前徒有開例之名仍無濟工
之寔今仿陝西賑饑事例酌量增減另行條
列庶幾撥納者衆工程得及時興舉尋

命同九卿科道入

諭詢捐納無累百姓否于成龍奏可保無累
上曰前所行捐納事例或因軍需孔亟或因
拯救災民銀米不能卽至其地爲一時權宜
之計至修理河工錢糧並非難于措處豈可
遽行捐納捐納之人豈盡殷寔大約稱貸者
多不賸削百姓則逋負何由而償且居要津
者不給銀而虛冒捐納亦復不少陝西所捐
銀兩現今多有虧空朕從寬未究是皆有司

不能殫絕情面屬說所致若不取償于百姓
何以補其缺額如此而云無累百姓可乎成
龍奏

皇上憂勞百姓屢發帑金百餘萬賑濟陝西
且次第蠲免各省錢糧動至數百萬臣愚拙
無知因河工費用浩繁請開捐納茲蒙
聖諭切指情弊臣冒昧陳奏之罪奚辭

上曰爾向日議河工事曾面奏減水垣宜塞
不宜開今果可塞乎成龍奏曰臣彼時妄言

今亦照新輔而行

上命大學士以成龍所奏令九卿詳議尙書薩穆哈等議河道大修歲修理應陸續題請今成龍以數千里工程欲一時盡行興舉因請添設道員同知通判等官又條列捐例凡革職年老患疾休致之人及布政使大員概許捐復俱未協事宜懷私妄奏應革職得旨從寬留任仍興舉簡要各工七月疏言洪澤一湖密近淮城爲淮睢二瀆所匯歸伏秋

水發波濤澎湃僅恃高堰土堤雖加築堅固仍須歲修搶修急宜改建石工所有六埧及自小黃莊起至古溝東涵洞止共佔工料銀五十萬兩有奇疏下部議從之三十四年八月以督理河務勤勞復原職旋丁父憂回京奏山陽縣龍王閘修造尙遲五空橋及檀度寺應建閘通運高堰石工應開武家墩及楊家廟等埧運料事並下新任總河董安國卽行三十五年二月

上親征噶爾丹統師由中路進先期以侍郎
王國昌督運撫遠大將軍費揚古西路軍糧
成龍以左都御史銜同侍郎李綱左通政喀
拜督運中路軍糧兵丁各裹糧八十日八十
日外給以成龍所運四月成龍詣格德爾庫
御營奏運正項米一萬九千石多賁八千石
遵

旨酌留各駟五月丙辰朔

駕次拖稜成龍奏直隸第一運至第六運已

過第十五站格德爾庫地山東省第一運已
過第十二站蘓勒圖地

詔以後運之六七千石留拖稜備旋師之用
癸亥

駕至克魯倫河噶爾丹驚竄

上率前鋒軍追之五月至拖諾山計軍糧日
期將滿而成龍所運未至乃以內大臣馬思
喀爲平北大將軍率輕騎襲二十日糧追勦
止留扈從

御營兵糧七日戊辰西路軍大敗噶爾丹于昭穆多

上旋師至拖稜成龍始至

命留駐散給諸路軍糧六月遵

旨移駐察罕諾爾收貯科圖等處餘糧八月事竣還京九月

上巡幸北塞察視軍情

命成龍偕李鈞喀拜先赴歸化城督理糧務十月

駕至歸化城

諭曰爾等前此遲悞罪在不赦今許爾等効力自贖成龍因與李鈞喀拜王國昌等各自備驄數十以供挽運又自備驄馬車輛運呼坦和朔倉米一千五百石至喀喇穆倫復助馬塘站十一月

駕過鄂爾多斯之哲固斯臺將

旋蹕

命成龍與李鈞等分駐各站辦事十二月還

京三十六年正月

詔再親征噶爾丹成龍請從効力

命同王國昌李炳等先往寧夏督運軍糧奏請以旂員及情願効力人分管押運派鄂爾多斯兵牽駝負載並以理藩院司員隨行上皆允所請

召問何日起行成龍奏俟効力人員同行

諭戒前者因待衆遲悞毋再瞻顧他人致已獲罪閏三月自寧夏用船起運牽馬駝至第

十站白塔接運從陸

駕過白塔二十五里駐營七日大將軍費揚

古偵報噶爾丹竄死

上旋蹕成龍奉

詔督運三之一赴費揚古軍餘留貯所至各

站尋又運回諸路餘糧于船站貯用乃還

詔免議遲遲前罪仍議敘如部議加四級復

特予騎都尉世職三十七年二月

命以總督銜管直隸巡撫事三月興修永清

固安至張協七十里舊隄挑濬渾河淤沙十旬竣工

詔錫名永定河建廟以祀奏設南北岸兩分司一以重責成視黃運兩河之例

勅部擇諳練河務之候補候選人員赴工効用七月疏言蕢皇縣地處重山界連三省久爲賊藪近遵

恩諭勸導自新已相率歸誠而防緝不可無兵應設馬兵四百以守備千總各一把總二

轄之又言固關舊設馬步兵七百餘名疊經裁汰抽調止存三之一應移王家坪裁存馬兵九十名隸固關叅將增設千總把總各一疏下部並從之十一月疏言駐防滄州滿洲官兵三百二十六員各歲需粟米七千二百八十餘石從前截漕支給近因部議不准截漕以本州額征粟米撥給僅得其半餘皆採買隣封市價低昂無定運費贏縮無常每誤二八兩月支放之期請自明年仍循舊例裁

漕支給爲便疏下戶部不准

特旨如所請行是月董安國以不諳河務罷任仍授成龍河道總督

諭大學士九卿曰于成龍屢委以事尙克勉効河工須相機料理所與勅書可入各部不得掣肘語三十八年三月

上巡閱高家堰歸仁隄等處以增築疏濬事宜

諭旨籌辦五月疏言黃運兩河舊派徐州屬

邑民夫六千九百餘名助河兵供役率以老弱充數且多逃曠請按派夫舊額改令每名征銀五兩爲添設河兵月糧又疏言

皇上親視河工

指授方畧大爲修治臣以需帑浩繁請許急公人員捐修蒙

諭如果修築堅固疏濬深通告成之日自有議敘仰見

聖心寸功必酌現在應修之處不一若不酌

定成例恐効力人員觀望不前謹條列計丈
議敘各款疏並下九卿議行九月以疾乞假
命在任調理三十九年三月卒遺疏至得
旨于成龍才品兼優服官勤慎屢經簡任寔
心辦事不辭勞瘁宣力有年歷著成效前因
患病遣醫前往診視方期痊可茲聞溘逝深
爲軫悼下部優卹
賜祭葬如例諡曰襄勤子永世襲騎都尉
世宗憲皇帝雍正八年以成龍入祀賢良祠

郭世隆列傳

郭世隆漢軍廂紅旗人父洪臣原籍汾州
世祖章皇帝順治二年英親王阿濟格統師
至九江收降明故將左良玉之子夢庚及部
衆來京入旗洪臣預焉分轄降衆爲佐領
聖祖仁皇帝康熙四年世隆襲管佐領八年
授禮部員外郎二十五年擢監察御史二十
七年

命赴盛京察審

福陵守兵赴訴其兄冤死事得誣良刑逼自縊狀原審侍郎阿禮瑚及司員俱坐失寔褫革世隆還京疏言

盛京刑部凡已經告發事件執法結斷者甚少貪緣和息者居多以故曲直莫分刁誣愈熾近者旂人宜爾根控訴命案先經私和後復涉訟仍不審結乞勅嚴察此案私和之兩造及聽許部員寔寔情而肅法紀又疏言

盛京鳳凰城及山海關各設有迎送朝鮮之貢使五品官數員每逢貢使至以一員送迎此外別無職守且既有通事官從鳳凰城隨行至京沿途撥兵護送料理食物夫役車輛迎送官寔屬贅設應行裁汰又疏言設官久任以其能熟習民風土俗而去弊興利也若不肖之徒往往以久任滋弊如盜採人蔘律有重典惟不肖官弁與奸民熟習互相容隱故弊竇彌多每年報部採獲之數不及千觔

而京師及各省貨賣者不啻百倍皆由開原
邊口縱奸民盜採山海關又縱其私販宜分
別故縱失察嚴定處分其守口官員與山海
關城官尉應每年更換以清弊源疏並下部
議行又
詔山海關官兵停止盛京將軍管轄降調現
任城守尉照張家口例兵部選員更換十月
擢內閣學士是月
上謁

孝陵過通州有山西禮縣民訴知縣萬世緯
知府紀元婪取狀

命世隆往會督撫察審鞫寔萬世緯貪婪科
派杖斃縣民論斬紀元受賄舉荐卓異論絞
二十九年四月充

國史副總裁七月直隸巡撫于成龍內陞左
都御史以世隆代之先是戶部奏廂紅旂罷
任安溪知縣孫鏞首福建巡撫張仲舉布政
使張永茂催征

恩免錢糧侵隱入已

上遣郎中吳爾泰等往會總督與永朝勘訊
既而

上聞吳爾泰甫至卽拘訊知府六人牽連州
縣官數十人乃

命世隆往世隆至則研訊司府州縣胥役數
人得張仲舉與布政使張汧索取州縣賦冊
竄改撤銷賫解批迴重造司冊侵隱已征地
丁額銀作民欠蠲免狀又張汧陞湖廣巡撫

虧帑三十餘萬因仲舉前任湖廣布政使亦
虧帑相約互抵仲舉抑勒道府捏具借帑印
領結按察使田慶會令出結署事及張永茂
受代仲舉聞張汧在湖廣賍私敗露聞帑尙
未補完復截留府州縣額支官俸役食令慶
會給永茂又令永茂加取各屬賫解銀火耗
代爲彌補諸左証悉合遂先釋前此吳爾泰
拘訊牽連之府州縣官回任窮詰仲舉永茂
慶會各語塞並孫鏞控列雜賍亦鞫寔仲舉

侵那二十六萬三千餘兩擬斬永茂科斂一
萬七千餘兩擬絞慶曾受賄二千二百兩擬
徒各追贓入官被勒之屬員及改造冊檔書
吏概免罪疏入
上切責吳爾泰謬妄革去郎中發黑龍江効
力世隆疏下法司如擬行九月世隆將至巡
撫任
諭曰凡接任好官者難于成龍居官甚好繼
之不易爾係有才之人當勤謹任事三十年

二月疏言直隸守巡二道分管通省錢糧刑
名與各省布按二司無異應改部選爲請
旨簡授

上是其言下部從之是年順天保定真定永
平諸府屬夏旱秋歉

詔世隆履勘撫綏世隆察奏七十四州縣本
年及來年額賦分別蠲緩其受災較重之霸
州文安大城永清真定井陘獲鹿元氏贊皇
高邑臨城行唐靈壽寧晉十四州縣發賑四

月又遵
諭詳籌積貯之務疏言荒歉之歲以每州縣
饑民萬口爲率大口四合小口二合按名賑
給有五六十石之糧可供半年之食今直隸
捐納穀米一百三十萬石有奇應均撥收貯
州縣大者存五千石中者存四千石小者存
三千石庶可隨時變通賑濟荒歉常平倉米
今歲平糶六十三萬二千石有奇例應歲內
買補恐米價因之益昂應展限來歲五月具

原糶之州縣官雖有陞遷事故亦令木員買
還以撥應貯之州縣收倉庶杜推諉疏下部
議從之三十二年二月疏言奉天所屬州縣
連年大有米穀贏餘請

勅山海關但禁大車裝載暫聽旂人民人肩
挑駝負進關轉糶則永平等處米價可以漸
平疏下部議自三月至八月如所請行十一
月疏言宣府向設鎮道及十衛六廳與各營
分理錢糧駙務廳員限于佐領營衛皆屬武

弁政多杆格宜裁六廳十衛改設一府八縣
上是其言下九卿詳議九卿議令世隆分晰
定擬尋奏改宣武衛爲宣化府附郭前衛爲
宣化縣萬全右衛爲萬全縣懷安衛爲懷安
縣蔚州衛爲蔚縣龍門衛爲龍門縣懷來衛
爲懷來縣赤城堡爲赤城縣順聖川西城爲
西寧縣三十二年四月以真定路當孔道地
方遼濶自裁去總兵後分防弁兵甚少奏移
紫荆關副將駐真定酌調各營馬步兵二千

添設守備千總把總寺官分撥汛防以龍泉
關參將移駐紫荆關以真定營遊擊移駐龍
泉關三十三年四月以霸州等處因子牙河
堤決田畝被淹已遵

旨賑濟平糶其大城縣趙扶村之南隄青縣
之楊村隄至東子牙隄雄縣蒲淀五百淀之
東隄請卽修築又黑龍港河及王家口久經
淤塞請開濬深通疏入得

旨俞允三十四年二月擢閩浙總督三十五

年五月疏言閩省兵餉歲需銀一百三十萬兩有奇本省額征僅一百萬兩有奇向皆撥用雜稅及浙江協餉今兩澤愆期民間荒歉難以摧征請撥隣省帑銀三十萬兩以爲協餉俟民力少舒征補存貯以備不時之需三十六年七月疏言部臣以浙海關監督李雯請移寧波城外之關于鎮海縣增設紅毛館使洋船貿易令臣會議竊謂鎮海縣距寧波府城僅六十餘里洋船既至鎮海卽可直抵

府城移關設館于商民無所利益仍舊爲便三十七年四月疏言泉州府向征落地鹽稅銀一千五百九十兩有奇所屬七縣派引行鹽征課五千五百八十兩有奇若依巡鹽御史鍾甲保奏改落地鹽稅爲派引征課又加引七縣行鹽恐將來新引壅滯鹽價日昂有累民戶請仍循定例疏並下部議從之四十二年十月調兩廣總督四十二年七月疏言粵東至南澳起經碣石鎮至虎門協海面二

十餘里守汛遠濶請增設兵船于透對南澳之澄海協以資巡防海門一所最爲緊要應移達濠營遊擊守備千總把總駐劄改爲海門營以海門所守備移爲達濠營守備甲子一所乃險要海口從前止設千總一員應以鎮左營移駐與碣石鎮聯絡防守吳川營隔海百餘里有碣州一島宜以龍門協所屬之乾體營兵令白鶴寨守備千總把總統之駐劄碣州改爲碣州營白鶴寨卽以千總管領

至平海大鵬二所逼近巨海應專設二營其順德一鎮外有香山鹿門二協內有省會駐防兵可裁去總兵官止留遊擊爲順德營改鎮標左營爲平海營右營爲大鵬營下部議如所請四十三年四月疏言前奏添造戰船俱經報竣設立船兵自南澳至龍門令守備千總把總逐日帶領巡哨副將叅將遊擊每月會巡一次水師總兵春秋二季駕船二十分巡外洋至瓊州上年十一月至今年二月

先後擊敗賊衆于沱寧外洋沉賊船六斗頭
角海面沉賊船一瓊南萬崖二處海面沉賊
船二四十五年五月疏報海洋巨盜蔡玉也
等聚衆劫掠商船今已擒獲分別定擬斬流
得

旨遣刑部侍郎常綬往勘覆奏蔡玉也等五
人應立斬部議世隆平時禁賊不嚴及事發
又朦朧掩飾應革職于是罷任四十六年六
月赴授湖廣總督四十七年十二月條奏

守紅苗三款一沿邊安設塘汛已經周密惟
盛華哨起至鎮溪所一帶山高箐密難于瞭
望應酌撥鎮守兵八百名另設四營分駐每
日派官一員帶兵五十名遊巡一舊日苗來
內地名往苗叢每滋事端今以塘汛爲界址
苗除納糧買賣外不得擅入塘汛之內民亦
不得擅出塘汛之外違者治罪一內地奸民
與苗人結親至勾通爲惡不可究詰嗣後如
有前弊應斷離異下部議從之四十九年六

月疏劾祭告南嶽之翰林院侍讀學士陳壯
履繞道嘉魚滋擾駢站得

旨降陳壯履爲編修十月世隆內遷刑部尙
書五十年十月以山西太原流匪陳四等六
十餘人携婦女數十乘馬騾由湖北往湖南
貴州詭稱赴雲南開墾索取州縣口糧劫掠
商賈財物世隆前任總督不卽察究縱容滋
蔓革職罷任五十二年三月遇
萬壽慶典復原品五十五年九月卒年七十

有二後祀直隸福建浙江廣東廣西湖廣等
省名宦

貝和諾列傳 子馬喇附

貝和諾滿洲正黃旗人姓富察氏尙書濟席
哈之孫也

聖祖仁皇帝康熙二十七年由工部筆帖式
授戶部主事游遷兵部員外郎戶部郎中兼
佐領二十四年十一月遷兵部督捕右理事
官尋遷大理寺卿三十五年二月奉

日 點 日 日
日 日 日 日
日 日 日 日

命往山東經理開河五月總漕桑額奏漕船
盡過濟寧較上年早月餘皆仰賴
睿慮周詳豫遣卿臣貝和諾封關蓄水啓閉
以時六月貝和諾還奏漕船陸續抵通
上日遣官有益漕運自後可仿行之七月遷
都察院左副都御史三十六年正月擢戶部
侍郎十一月禮部奏朝鮮國王李焯以旱澇
頻仍廩庾空乏八路流離請開市義州中江
貿穀得

天 賜 聖 恩

